

PIHLIHBI

Wargahng Poal Yihr Yaa Pihlihbi

Rob Ke Nying Warga

Warga gihr Poal naa agweede yihr yaa Pihlihbi ngo anaa agweede ke yihr akuud umodho gihr yaa ayiiho ge anaa akwanye yi piny Yurop. Poal anaa yi thijin ge agweede kitaab gihn ni, kede a kuohme anaa ayihny jo mahne mooge maa yaa yiiho me tiihyo ree. Poal cwihnye anaa arahnyo ke nying giuh ucahb ge puohny kiin akuud yaa yiiho yi Pihlihbi. Abea keehd maano, e cwihny Poal amedo yi warga gihn ni bang gihn ngo arubo ke rob me cwihny be diiw yea ke dhe yoohn yiiho gihre naa ayiihe Jeacuu Kriihjto keter.

Poal yaa yiiho geen Pihlihbi ge aleeye yi warga gihn ni ke nying gihn aohr gene giuh nyepinye maa anaa akonye ree ke gen. Warga agweed Poale ne ciihm cwihny jo yiiho giuh Pihlihbi beere cwihny gen deed gene deedo ubahnge yihdh gen be baadh ke nying alyaahbe giuh apahdh wiih Poal kede a wudh gen ke ngud gen. Cwihny gen aciihme kejea ngoor gene dhe yoohn beer gihr Jeacuu beere wudh gen be kadh ke giuh upiny kan e pahdh aduule yihdh gen kede a giuh nhyaam. Ngo ateede yihr gen kejea beehd gen naa anweehd ke Jeacuu ngo beehda muuny Juog maa ayoad gene ke nying yiiho gihr gen. Ngo kuu ayoad gene kaa nying wuor loohng Judea kede a giuh yaay ne yug Judea. Poal agweehdo ke nying med cwihny kede a doohr ne cub Juoge yihr yaa beehdo naa anweehd ke Kriihjto.

Gihn wiihe ne maalo yi warga gihn beehda med cwihny, diiw cwihny, nweehd kede a kwany dhe yoohn yiiho kede a

beehdo gihr jo yiiho. Warga lan cwiwny Poal ke nying akuud jo yiiho giih Pihlihbi, ngo anyoadhe thiow.

Kaa Acaan Luube

Lum umodho 1:1-11

Giuh ayug rog gen rih Poal ke ngude 1:12-26

Kuowo tiehd ke Kriihjto 1:27-2:18

Gwiihdo ke nying Timodhy kedea Epabrodiitoj 2:19-30

Toohn ke nying jo mahn kedea giuh krahg 3:1-4:9

Poal kedea gome giuhe maa yaa Pihlihbi 4:10-20

Gug luube 4:21-23

Maahdh

¹ * A Poal kedea Timodhy wa ge yaa tiuhj giuh Jeacuu Kriihjto, wa ne gweehdo yihru wu yaa nii cing Juog ge anweehd ke Jeacuu Kriihjto. Wu ge beed Pihlihbi, ge ayiiho ke dhe yoohn Jeacuu Kriihjto kedea yih jo doonge giuh ne kiin yaa yiiho maa jo kony gen yi tiuhj gen.

² Beehn Juog Wuur kedea Jeacuu Kriihjto Ruohdh cub gene muuny kedea doohr.

Poal Muohj Koohr Juog Kedea Kwahyo Kaa Nying Yaa Yiiho Giuh Pihlihbi

³ Juog giuh wuora koohre beehde muohja muohjo nea bangu para paro. ⁴ Thiow ge kwaaya kwaj ke nyingu cang, e a kwahy kaa med cwiwny, ⁵ bang giuh akonyu an keehd tiuhj ke nying Ciig Beer. Kuny giuh noono ngo athubo ke wong cahng ayiihu Ciig Beer uwahnhe cahng tihn. ⁶ Cwiwnya med thiow bang giuh ngo ngahya kejea Juog ngaa athubo ke tiuhj yi koohmu ke dhe yooh me beer wa kwaad man ubar maalo ke tiuhj kiinu ukeehle ngo guge uwahdhe cahng uduu Jeacuu Kriihjto.

* 1:1 1:1 Timodhy: 1Kor 4:17 1:3 1:3 Rom 1:8-10; 1Kor 1:4; 1Th 1:2-3
1:6 1:6 2:13; 1:10

⁷ Cwihnya med ke nyingu kedea kare nud umihn cwihnya bang gihn wu beed yaa aduuna. Keehd maa amag an yi thijin wale keehd me naa yi kala ne puohnya Ciig Beer ukeede piny e wo cang muuny Juog unywaago nywaago. ⁸† Beehda gihn me keehd Juog e ngo ngahye kejea cwihnya ayuohd bangu cang ke dhe yoohn nhyaahro gihr Jeacuu Kriihjto.

⁹ Juog beehde ngo kwaya kwayo ke nyingu beere nhyaahro gihru ke kiinu ree jwage jwago ke dhe yoohn ngahy nyepinye kedea ke dhe yoohn dead yihdh gen. ¹⁰‡ Dhog yiehdh nu ge nuu ukony wun ungeyu gihn maa adiehr beere cahng duu Ngad Boadh nyoge e awuohj me thiin me yoade rogu tooro. ¹¹ Awuohj utooro rogu bang gihn wu ayug Jeacuu Kriihjte, naa abiohgrwaale beere e nying Juog ke leeyo kedea upoonge.

Kar Beehdo Keehd Kriihjto

¹² Jo wan, cwihnya ne bange unghayu ngo kejea kwaad giih ayug rog gen riha, ge ne kony Ciig Beer udoohnge ne gihn me bar maalo. ¹³ Noono, e yaa koar paar jaah kedea nyoge mooge thioh ngo ngahy gene kejea a beehdo ne maabuuj kan kaa nying gihn nahga ngad Jeacuu Kriihjto. ¹⁴ Beehdo gihra yi thijin thioh cwihny yaa yiho me thoohdh aweehge ngahmo ubahnge cwihny gen be diiw rih Jeacuu, kedea upuohny gene Ciig Beer e lwahr tooro rog gen.

¹⁵ Ngo beehda adiehr kejea nyoge mooge kiin gen ge upuohnyo ke nying Ngad Boadh nyoge e yihdh gen pahng ke giih tiel kedea ke giih ater. Kedea ngo adiehr kejea

1:7 1:7 2Kor 7:3; Epi 3:1 † 1:8 1:8 1Kor 16:24 Nhyaahro gihr Jeacuu: 2Kor 5:14 1:9 1:9 Klo 1:9-10 ‡ 1:10 1:10 Rom 12:2; Epi 5:27; Judea 5:14 Cahng Ngad Boadh nyoge: 1Kor 1:8; 2Kor 5:10; Pihp 1:6; 2:16 1:11 1:11 Jon 15:8; Jeam 3:17 1:12 1:12 Epi 3:1; 2Tim 2:9 1:15 1:15-17 2Kor 2:17

nyoge me thoohdh nud thiow me cwihny gen ne tiihy gihn me beer ¹⁶ Kwaad yaa ni tiihyo beer ngo yug gene wa maano bang gihn nhyaahro nud yi cwihny gen kede a ngo ngahy gene thiow kejea Juog e naa ayug an ne ngaa me rubo ke nying Ciig Beer. ¹⁷ Abea kwaad yaa yihdh gen pahng ke tiel, Ciig Beer be puohny gene kaa cwihny gen me cang bang gihn ngo par gene paro kejea gihn nu a athoohre yi gihn me raaj kara ge beeda yi thijin. ¹⁸ Abea nea mara, e gihn me raaj yi puohny nu tooro. Bang gihn keehd me puohny nyoge ke tiel yi yej wale me puohny nyoge ke dhe yooh me beer e poohd e Ciig Beer ke nying Ngad Boadh nyoge e ne puohny. Noono e gihn me rahny cwihnnya ke nyinge tooro.

Adiehr muon cwihnnya ubeehde e med bang gihn ¹⁹ ngo gihn me ngahya ke yaa aduuna kejea a uluny oogo yi thijin. Giih umeehg an luny oogo beehda kwaj gihru bang Juog ke nyinga kede a kuny gihr Wahy Juog ge yoad bang Jeacuu Kriihjto. ²⁰ Giih daahda ke cwihnnya kede a ge gaahna ge amuu: A daahd ngo ubahnge tiihya ge tiihya yihr Juog be gaahg, kede a daahd ngo ukedh Juoge ngabo yaa aduuna awaahn ni, wa kwaad kaa acoon, beere riha cuba cubo ne weehg wiih Ngad Boadh nyoge moaro yihr nyoge. Kaano, e gihn me raaj tooro bang wiih Ngad Boadh nyoge umoar kaa nying kuowo gihra keehd me kuowa wale maa athow. ²¹ Beehd wiih piny kan gihr nyinge tooro yihra nea padh ke nying tiihj yihr Ngad Boadh nyoge kede a thona e ne beer keraahyo bang ne yoad Ngad Boadh nyoge. ²² Abea nea a bar maalo ke kuowo wiih piny kaa nying thaahb tiihy Ngad Boadh nyoge, e ma roma ke kwanyo kiin kuowo ke thoo wiiha adhiehdhe. ²³ A ne kiin nyepinye ariow: ma beer yihra beehda ubahnge a be

cahg beehdo wiih piny kan, ne ci bang Ngad Boadh nyoge. ²⁴ Abea beehdo gihra wiih piny kan e ne ngweehn yihra bang ukonya wun. ²⁵ Gihn ni ngo beehde e ayiiha kejea a poohd ubeehdo ke wun bang ne kony wun yi dhe yoohn beehdo yihr yaa yiiho kede a ne jwag yiiho gihru ubeehdu ke med cwihny wu yaa Pihlihbi. ²⁶ A tiihyo wa maan ni beere ge beehna bangu, e kare nud umaahgu ke nying gihn atiihy Ngad Boadh nyoge yihra.

²⁷ Gihn teeg keter beehdu ke dhe yoohn beehdo gihn arob Ciig Beere yihru ke nying Ngad Boadh nyoge. Keehd me kobe kejea a ubeehno ne maany wun wale a be rom wahnho ne maany wun, e ngo dhiila kaa ngahyo kejea wu beehdo kaa cwihny acielo yi yiiho gihru. Ke dhe yoohn beehdo gihn nu e wu dhiil cuungo naa acielo yi yiiho gihru ke nying Ciig Beer. ²⁸ Wu kea tudo yihr jo mahn giihu. Beehdu e cwihnyu adeedu. Gihn nu nyoadh ngo yihr gen kejea ge nyoge me nying gen arwaahny Juoge abea wu aboadh Juoge. ²⁹ Giih nu cang rog gen uyug gene bang gihn Juog tee acube yihru ne tiihj ke nying Jeacuu. Wu tiihyo yihr Ngad Boadh nyoge kaa dhe yoohn gihn ayiihu lume kede a wu tiihyo yihre kaa dhe yoohn raahm gihn ayoadu ke nyinge. ³⁰ Awaahn ni rogu amadu banga ne buohj ke tiihy Ciig Beer gihn. Ngo beehda tiihj maa abuohja ke tiihy ngo coon, uwahnhe tihn, e ngo uneehno yihru kejea a poohd ubuohj ke bar maalo ke tiihj ke nying Ciig Beer.

2

Jeacuu Beehda Ngaa Me Cwihnye Puol Kede a Ngo Teeg

¹ Dhe yoohn kuowo gihru naa agwiir Ngad Boadh nyoge ge beehdu kii ngo awaahn ni tee acube yihru, kede a

nhyaahro gihre naa ayuge yihru wu buu weehge diero keehdo. Koohmu amor Wahy Juoge ubeehdu beer ke keewu. ² Ke nying giih nu e nyingu akwaya kejea meehgu cwihnya mihno keter bang gihn yihru ne par acielo, kedea yihru ne nhyaaro maa yihru ne beehdo ke cwihny acielo.

³ Giih lahj cwihny keá yugu, kedea gihr nyepiny keá yugu ke nying nhyaam. Beehdu ke dhe yoohn puol cwihny, nahg dhaane ree piny udoohnge wa nyoge mooge ge ne beeye yihre. ⁴ Dhiilu ngo ke ngahyo kejea dhaano tiihyo kaa nying ngaa moogo, abea ngo be tiihyo kaa ke nying mar ngude keede.

⁵ Gihn tiihyu dhiile roomo keehd kwaad kaa atiihy Jeacuu Kriihjte.

⁶ Jeacuu e yihre ne cahdo gihr Juog ni,
naa adoohng ne dhaano,
e ngo kea tero kejea wiihe rome romo ke Juog.

⁷ Abea gihn ayuge beehda yiiho e naa ayiihe ngo ke kar wiihe e keede
udoohnge ne dhaano utaahngo uduoge ree piny ne baahng yihr nyoge.

⁸ Ree abeehne ne yugo ne ngaa me tee tooro yihre
kedea uyiihe thoo keehd thoo me raaj wa thoo rih yaadh maa ariihw.

⁹ Ke nying gihn ayiihe kwaad beehd nu, e wiihe abeehn Juoge ne tihng maalo ucube tee yihr ngo kedea ucube ngo yi ruohdh.

¹⁰ Noono e lihng nying Jeacuu

2:2 2:2 Jon 13:34; 1Kor 1:10-11; Gal 6:10; Epi 5:2; 1Jon 4:12 2:3 2:3 Rom 12:10; Gal 5:26 2:4 2:4 1Kor 10:24 2:5 2:5 Jon 13:15; Rom 13:14; 15:5
2:6 2:6 Jon 1:1-2; 17:5; Judea 1:3 2:7 2:7 Jon 1:14; Rom 8:3; 2Kor 8:9; Judea 2:14, 17 2:8 2:8 Jon 10:17; Judea 5:8; 12:2 2:9 2:9 Tiihy 2:33; Epi 1:21; Judea 1:4 2:10 2:10-11 Jon 5:23; Rom 10:9; Any 5:13

e kwaad jo ne Paar Maalo kedeá yaa wiih piny maa yaa athow cang cung gen rung gene ke piny nyume.

¹¹ Noono thiow e kwaad dhaano cang rob ngo kea

Ngad Boadh nyoge beehda Ruohdh.

Ne rob wa maano, beehda leej e ne yug gene yihr Juog Wuur.

Wu Neehn Daahr Ciehro Ge Meeny Piny

¹² Wu ge jo'a maa anhyaara wa kwaad kaa anaa awuoru leeba maano e a poohd ne bangu, kea noono baru maalo ke wuor leeba, keehd me toora kiinu. Kedeá baru maalo ke tiihyu, maano e wu tud ke rih Juog cog, beere dhe yoohn tiihy boadh wahy baaru ke maalo. ¹³ Baaru ngo bang gihn ke nying nihn e Juog beehde ne kiinu ne cub tee yihru kedeá cwihnyu loge logo ne meehg wun yug gihre ge daahde yihru.

¹⁴ Wu keá peehmo kedeá wu keá duohr ke nying giikh me reje ke kiinu udoohnge wa gihn yugu ngo padh athiir.

¹⁵ Noono e wu ubeehdo ne nyethen Juog me awuohj tooro rogu keehd me beedu wiih piny me yea apahng ke giikh me reje kedeá yea apahng ke nyoge maa yaa adhemuohme. Beehdu ke beehdo me beer ne yug rogu kiin gen neehn ciehr ge meeny piny yihr nyoge ni. ¹⁶ Wa kwaad kaa apuohnyu Ciig Beer ge rubo ke nying kuowo yihr nyoge, e kwaad puohny gihru noono wiiha utihngu maalo cahng uduu Ngad Boadh nyoge, bang gihn ka beehdu kii ngo kedeá dhe yoohn tiihyu e nuu unyoadh ngo kejea gihn atiihya kuu anahg gihn me gihr nyinge tooro. ¹⁷ Ka moogo e remo gihra uwoj piny wa gihn maa anahg piny yihr Juog beere yiiho gihru nieng piny. Nea e naa gihn

2:13 2:13 1:6; Jon 15:5; Rom 7:18; 15:18; 1Kor 12:6; 15:10; 2Kor 3:5 2:15-16 1:10; Mat 5:14; 10:16; 1Kor 1:31; 2Kor 1:14; Gal 2:1-2; Epi 5:8; 1Th 2:19
2:17 2:17 Rom 15:16; 2Tim 4:6; 1Jon 3:16

uyug ree noono e cwihnya med kedea unywaaga mihn cwihny gihn nu ke wun tiehd. ¹⁸ Kedea thiow cwihnyu udhiil mihno bang gihn uyug ree ge umeehg cwihnya mihno keehd wu tiehd.

Poal Arubo Ke Timodhy Kedea Epabrodiitoj

¹⁹ Jeacuu Ruohdh gaahna gaahno kejea dhe yooh ucube yihra ne oohr Timodhy bangu piow piow beere cwihnya naa yum ke nying lum ulihnga ke nyingu. ²⁰ Bang gihn Timodhy e naa ngaa me cwihnye ngahya kedea e naa ngaa me daahd ukonye wun ne cohg. ²¹ Kwaad dhaano cang par mar ngude e keede ne maany ka konye ree kii ngo abea padh me tiihye ke nying Jeacuu Kriihjto. ²² Keehd wu keedu e ngo ngahyu kaa arome cuungo yihdh nyepinye kii ngo. Kedea ngo ngahyu kaa atiihye ke an. Ngo atiihyo wa mar nyedhoohg me tiihyo ke wahn. Wa atiihyo keehde tiehd keraahyo ne puohny Ciig Beer. ²³ Noono e ngo acuba yi cwihnya uohra ngo bangu ka me cahng nea lug gihra ayug. Ka moogo e a ulony oogo wale a buu ulony oogo yi thijin. ²⁴ Abea Jeacuu gaahna gaahno kejea a urom beehn bangu ka me cahng.

²⁵ Ngo apara kejea ngweehn uohra ngadu ge cuohn ne Epabrodiitoj bangu. Ngo beehda ngad wuohdo gihru maa anaa aohru banga kedea ngo acuungo ke an yihdh giikh me teeg ne kony an yi tiihy Ciig Beer. ²⁶ Cwihnye ayuohd ne lieh wun, kedea udiero kea yihdhu abaadh ke nying atwaany gihre naa alihngu. ²⁷ Anahg atwaany me yea atooro wahy. Abea gihn me beer keter ngo abeehn Juoge ne yugo yihre, kedea padh yihre keede abea keehd an thiow e Juog lan cwihny me duohng ayuge utoore. ²⁸ Cwihnya amada yi lum oohr ngo bangu beere cwihnyu

umihno keehdo ge niidu ngo kedea beere lan aduuna doo piny. ²⁹ Loru ngo ke med cwihny ke nying Jeacuu, bang gihn ngo beehda ngaa maa ayiih lum Jeacuu. Kwaad nyoge me wa en wuoru gen wuoro. ³⁰ Wahye ge anaa agwaaye yi thoo adhaahr wonge anaa acej rwaahnyo bang gwiihdo yihr Ngad Boadh nyoge ke dhe yoohn kony an. A akonye ke dhe yoohn ne konyu an keehde.

3

Dhe Yoohn Doohng Naa Abiohgrwaal Ke Juog

¹ Wu jo'a ge ayiih Ciig Beer, ne gihn muu ukuonga ke robo yihru ce gooya wiih loohnga piny. Beehdu ke med cwihny ke nying gihn atiihy Jeacuu yihru. Abea a be dhieg ke ber lubo maa agweeda piny yihru coon. Ngo beer ubera ngo beere wu udoohng teeg yi yiiho gihru.

² Koaru rogu beer mee ke nying jo nu yug giikh me reje. Ge beehda nyoge me room kaa goohy, kwaad yaa nhyaar liir dehn nyoge ke nying thoam. ³ Wo naa yaa athoam abea padh gen. Wo naa athoam bang gihn Juog wuoro kaa dhe yoohn Wahy Juog kedea cwihnyo med bang gihn kuowo gihro ngo anweehd keehd Jeacuu Kriihjto. Gihn me gaahno tooro yihdh giikh yug yi kuohm dhaano neehn thoam kejea dhaano yuge yugo naa abiohgrwaal ke Juog. ⁴ Nea giikh wiih piny ge naa ke gaahno, e giikh nyepinye me thoohdh me ne roma ke gaahno nud.

Nea ngaa me koohbo kejea giikh tiihye ge gaahne gaahno, e an ne yihra ne giikh me thoohdh me gaahna. ⁵ A abeehn ne thoamo ke batien nihn abiihjberiw batien cahng anyuol an, kedea yaa tien Paar wan ge beehda yaa Yijarael dhe wod Paar Benjamin. Wura ge ke miiha

ge beehda yaa Yijarael. E thiow loohng gihr yaa Judea awuora ne cohg ke dhe yoohn wuor wane ngo wa yaa Paarijea. ⁶ A anahg ngaa me nhyaar yug kwaad gihn ngahya ge daahd Juoge yihra ni. Noono e giih ajohr me thoohdh ge ayuga rog yaa ayiih lum Jeacuu cuohna kaa tiihy nu e ne meehg cwihny Juog mihno. Nea dhaano doohng naa abiohgrwaal kaa dhe yoohn wuor loohnge, e a anahg ngaa maa abiohgrwaal me kwaade tooro.

⁷ Giih nu na tiihya kaa nying wuor loohng, wiiha anaa apara kejea gihn me beer uyoada. Abea awaahn ni abeehna ne yoado kejea gihn me beer me kahl gene yihra tooro nea a daahd tiihj ke nying Ngad Boadh nyoge. ⁸ Padh giih nu keed gen, nyepinye cang ge niida e gihr nying gen tooro nea a daahd unghahya Jeacuu Kriihjto Ruohdha. Kwaad giih na yuga ge abeehna ne wiio cang. Kede a giih nu cang ge niida wa yuu dhe kala bang gihn Jeacuu Kriihjto Ruohdh cog e naa acuba yi cwihnya, ⁹ beere riha yuuda e a nweehd keehde naa acielo. Dhe yooh me beehda naa abiohgrwaal a keeda ngo tooro bang gihn dhe yoohn nu beehda gihr loohng. Juog e naa ameehg an doohng ne abiohgrwaal ke nying yiih Ngad Boadh nyoge. ¹⁰ * Gihn daahda beehda ne ngahy Kriihjto kede a ne ngahy teeg ameehg Juoge ngo cahro yi thoo. A adaahd unweehda keehde uyoada raahm udoohnga wa en yi thone. ¹¹ Wale beere ngo gaahna gaahno kejea a ke nguda a udhiil Juoge weehg cahro yi thoo uyoada kuowo me be gug.

Dhe Yoohn Gihn Daahd

¹² Kea paru kejea a adoohng ne ngaa me ka me daag ree tooro. A poohd ubuohj ne yoad dhe yooh me doohnga wa

3:6 3:6 Tiihy 8:3; 22:4; 26:9-11 3:7 3:7 Mat 13:44, 46 3:9 3:9 Rom 1:17
 * 3:10 3:10-11 Rom 6:8-11 Udoohnga wa en yi thone: 2Kor 4:10-11 Cahro:
 Tiihy 4:2; Rom 5:17 3:12 3:12 1Tim 6:12; 2Tim 4:7; Judea 12:1

Jeacuu Kriihjto. Ne doohng wa Jeacuu e naa gihn acuohne an ke nyinge. ¹³ Jo paar wan a ke nguda riha be kwaana ne ngaa maa adoohng wa Jeacuu Kriihjto. Abea gihn nud a daahd uthaahba kwaad gihn poohd kaa ayugo, ge ne wong maalo ni. ¹⁴ Noono e a utiihyo keraahyo udoohnga wa Jeacuu Kriihjto, batiene e Juog a ukedhe paare ke nying gihn atiihy Jeacuae yihra.

¹⁵ Wo cang ge yihro ne yiiho me teeg, cubo wudho ne doohng ne Jeacuu Kriihjto. Abea nea nyoge mooge nud kiinu me yihr gen ne par moogo me ne keede, e ge umeehg Juoge ngey gihn maa adiehr. ¹⁶ Nyepiny acielo me teeda gen, baro maalo ke beehdo ke yoohn acoon e daahd Juoge.

¹⁷ Jo'a madu rogu bang yaa tiihj kwaad giij tiihya. Cubu cwihnyu piny ne ngoor dhe yoohn beehdo naa anyoadh wane yihr nyoge. ¹⁸ Gihn daahda ke robo yihru ngo aroba coon yihru tiel me thoohdh kedea awaahn ni ngo bera bero ke piij wonga ne cur. Nud ke nyoge me thoohdh me dhe yoohn beehdo gihr gen ge aweehg doohng ne jo mahn keehd Ngad Boadh nyoge naa athow ngahy yaadh maa ariihw ne boadh won. ¹⁹ Ge nyoge me caa paar maaj bang gihn giij ungoom kan ge naa aroony gene ne Juog yihr gen. Kwaad giij kahl yaahr kuohm ge ne beel gene ke gen kedea giij ungoom kan ge naa acub gene yi cwihny gen. ²⁰ Ke kur maro Paar Juog e naa kar beehdo yihro, kedea ge beehdo awaahn e wo koar Ngad Boadh won, Ruohdho Jeacuu Kriihjto ge beehn ke yoohn Paar Juog. ²¹ Koohmo ge thow ni, ge ubeehne ne waaro udoohng gene wa kuohme ge be thow, keehd teege noono ameehg ngo doohng ne ruohdh nyepinye cang.

3:14 3:14 1Kor 9:24-25 3:16 3:16 Gal 6:15-16 3:17 3:17 1Kor 4:16; 1Pii
5:3 3:18 3:18 1Kor 1:23; Gal 6:12 3:19 3:19 Rom 16:18 3:20 3:20
Epi 2:6; Judea 13:14 3:21 3:21 Rom 8:29; 1Kor 15:25, 28, 43-53; Klo 3:4

4

Maahdh Kedeá Cuohn Loohng

¹ Noono jo'a, wu ge anhyaara keter, kedeá ge bangu acana keraahyo! Cwihnya med keter kedeá wiiha mor ne rob ke nyingu ke nying nihn yihr nyoge. Caahn e wu keá dhaahr ke beehdo tiehd keehd Ruohdho Jeacuu.

² Wu ge nyemiiha ge cuohn naa Yudya kedeá Centiihje nyingu akwaya kejea madu lumu naa acielo, bang gihn wu beehda yaa yiho me wuor Ruohdh Jeacuu. ³ Kedeá yih thioiw ge beehda ngada me tiihy ke an tiehd kedeá me cwihnyi gaahna gaahno a daahd ngo ukonyi maahn giih ni ariow bang umahd gene naa acielo, bange a akony gene keraahyo ke puohny Ciig Beer gihn ni yihr nyoge. Gen maa Kelmen kedeá jo atiihyo cang ke an, ge abuhj ke puohny Ciig Beer noono e nying gen amad keew yaa nying gen nii kitaab kuowo.

⁴ Kwaayu beehdo ke med cwihny ke nying giih atiihy Jeacuue yihru. Ngo bera bero yihru jo wan, kejea beehdu ke med cwihny ke nying giih atiihy Jeacuue yihru. ⁵ Nyoadhu rogu ne nyoge me beeye yihr kwaad dhaano cang. Ruohdh beehne adoohng cahng. ⁶ Cwihnyu keá baadh ke nying kwaad nyepiny me yug ree, abea nea wu ukwahyo e kea kwayu gihn daahdu ke cwihnyu cang yihr Juog kedeá ke muohj koohre. ⁷ Noono e doohr gih Juog ge be rom dhaano utaahnge maa now ke ngeyo, wu umeehge beehdo e wu be dier bang gihn wu anweehd ke Jeacuu Kriihjto.

⁸ Jo'a, awaahn ni teeda teedo yihru kejea cubu giih me beeye ge yihr gen ne leej ke raahyo yi wudhu. Giih

me beehda ather, giikh me meehg kuohm wuoro, giikh me beeye yi wong Juog kede a yi nying nyoge, maa giikh me kahl nyaahro kiin nyoge ge ne dhiilu ke cub yi wudhu. ⁹ Dhiilu wudhu ke cub piny ne yug kwaad giikh apuohnya yihru uwiia ngo yi cingu cang, kwaad giikh alihngu e roba robo kede a giikh aniidu e yuga yugo. Noono e Juog ngaa cub doohr yihro ubeehdo tiehd ke wun.

Maahdh Ke Nying Muuj

¹⁰ A abeehdo kaa med cwihny keraahyo ke nying giikh atiihy Jeacuue yihra. Cwihnnya med naa acahgu nyepinye ke oohr yihra keehdo kede a giikh nu nyoadh ngo kejea banga poohd paru paro. A be kob ngo kejea wudhu anaa awul riha, abea ka nahg ka maa aromu ngo ke nyoadho e naa atooro. ¹¹ Kea paru kejea a teed ngo kejea a angoohng, a daahd giikh nyepiny. Padh wa giikh nu, bang giikh dhe yoohn beehdo e giikh nyepiny ne yihra kede a e giikh nyepiny tooro yihra ngo ngahya. ¹² Beehdo e giikh me ne yihra tooro ngo ngahya kede a beehdo e yihra ne kwaad giikh daahda cang ngo ngahya. Dhog yiehdh wan beehdo e diero tooro yiehdh giikh nyepinye cang ngo ngahya: ne beehd yi yahng wale beehd yi kahj kede a thioh beehd yi lonyo wale beehd yi ngoohngo. ¹³ Ngad Boadh nyoge e ne cub tee yihra me roma beehdo yiehdh giikh me beeye wale giikh me reje.

¹⁴ Abea giikh me beer atiihyu ge akonyu an yiehdh giikh me thoohdh naa apahdh wiia. ¹⁵ Thioh ngo beehde ngahyu keraahyo wu yaa yiio giikh Pihlihbi, kejea umodho ge anaa athubu ke ngey Ciig Beer ni, ge anaa aaya yi paaru ge cuohn ne Macedoanya, akuud yaa yiio moogo maa akony an atooro nea padh wu cog. ¹⁶ Keehd ge anaa

yi paan cuohn ne Thecaaloanika ni e giih adaag, ge daahda ni, ge aohru yihra tiel me thoohdh. ¹⁷ Padh kony e naa gihn daahda e keede, abea adaahd uyoadu gihn me beer ke nying tiihyu. ¹⁸ Giih ni ge naa luube giih muohja koohdhu ke gen ke nying giih kony naa acubu yihra. Kony gihn ayugu yihra duohng uyoohme ka daahda ke cwihnya. Giih akonyu an keehd gen ge akahl ngaa nyinge Eprobodiitoje yihra. Ge neehn ngwahj adung dung gihn duung yih Juog ne wuor ngo beere Juog cwihnye umihno rih dhaano. ¹⁹ Juog gihn ni wuora ni ge yihre ne kwaad gih ukuom cang deeh muunye ge duohng ucube yihru utoor gihn me daage bang wu anweehd ke Jeacuu Kriihjto.

²⁰ Leeyu Juog Wuur ge wuoro ke wong ke wong. E noono.

Maahdh Yih Yaa Yiiho Giih Pihlihbi

²¹ Wu yaa akuud yaa yiih giih Jeacuu Kriihjto wu amaahdha, kedeaa akuud yaa yiih giih ne kan wu maahdh gene. ²² Jo yiiho giih Juog ge beehd kan ni wu amaahdh gene cang adoohnge yaa ni tiihyo paar Jaah Roama.

²³ Beehn muuny gih Jeacuu Kriihjto Ruohdho beehde ke wun cang. E noono.

Anwehd Me Nyaahn

Luwo: Anwehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62